

# I PITA

## Pitayo Namolo Takoa Wia Wetekane Pipia

<sup>1</sup> No Pita Yesu Keraisuyo one agale oane auane yamotoa takoa moa kakaka Aposelo agome uku. I agale wiane wetekakilepa anu oya-lawe kiwi eya mone ta-meneke Podase Galesia Kapadosia Esia Bisinia ta-meneke toa pote mekika wetekaku-ye.

<sup>2</sup> Toneketai Akolaliyo papete wene toopikana toa taatekakome kipa one wa takoa motane yeneke uku. Nitane yene kiwike one Epetane Yomini awinome mekome kini wene moa kiyo akatapeneya. Nipa Yesu Keraisuyo okale-kama litia toa ni one kamateme kini namolo poane wene takoa koikatapeneya mea tomotoa taneya.

### *Akolaliyo Wipitia Toatekale Nepia Meato*

<sup>3</sup> Akolali tone Ali Muno Yesu Keraisuno etene one kei piato wane uku-ye. Oneme eya taneleke ni uku. Mana Yesu Keraisu tuaneya pikale moa kamotokaneya tokome anu oya-lawe toto one mea kawateko mana kono-mikiti moa lantikaneya. Ali atoa toto mama motoka matiyame taneya. Nitaneya tokolo toto one take mea kawoono, nepiatio wa wedia-kama nepia meko. <sup>4</sup> Nipa a tibuke mea kakete toateko pekupa one mana kono-mikiti kiwi lawetou wa oa pikana toa taatekoa toatekole nepia meko. One eni peku lawetekome meatekoya-kiti lomuameneya pioo. Ni padeyameka toa potokameneya pia takoaka

poamoā too. Eniya-kitipa kinikiya wa Akolaliyo a tibuke pikoā metekako. <sup>5</sup> Nipa anu oya-lawe Yesuke wene tugoā mekili tokome Akolaliyo one tele patu kautakoa meati wa pawe toa talo toko. Nipa wipitia ta pataka-pete one papete wene toopikouna toane taatekakene kiwi toane mou wa papete pawe toa talo toko.

<sup>6</sup> Nitikono, Akolali-pala ke wa wedia kakete tiki. Opi-mene padele padeleme ke enekakolo wene keda taneya meketeke pa wedia mekete tiki. <sup>7</sup> Nikepa eya wane uku. Kini kamoya golo wa akene kuepa toele wia yoa enekala tiki. Nitikili paya kuepa toeme takoa nootapekoyake kamo kuepa toeme noameneya tutu yeta pa piko. Eni kamo kuepa wipitia ta pataka-pete takoa poatekoyake tiki. Akolaliyo anu oya-lawe kipa one etene kamoya tetepo takoa mekome edikoa toa enekala toko. Nitoapa kini Yesuke wene tugoā mekile enekomēpa Keraisu Yesu wakapea noka-pete kiwi kei pia kini ibini kamotokademe toko. <sup>8</sup> Anu oya-lawe kimepa Yesuno lene timini enamoake oneke pa wene mekoa meki. Opiika one enameketeke oneke pa wene tugoā meki. Nitikete one-pala ke wa ikilepa edemo wamoo wa a tibuke wete pa tootapeneya meane tetepo takoa kolotine mekete iki. <sup>9</sup> Nipa kini Yesuke wene tugoā mea togakolopa kini yominipa one wa toa moo wa kolotine meki. <sup>10</sup> Akolaliyo one ali atoa kiwi edikoa pewe wiatekamopa one agale toaweā akane ali-kitame papete i i wa toaweā akama-kala nekeneya. Nitiketeka ali atoa toa motikilepa edoa toa moademe oko patu wa pitia yakatekakala toa mea tuma-kala nekeneya. <sup>11</sup> Nitima nekene toa

Kerai suno Yomini kiwike-kala awinokome eya wa wene takaneyaya. Kerai suno tete-kala moko kawa tuake wa kamomotokome a tibuke pa teleta tootapeneya pome mepoo wa wene takapikala taneya. Nitaneyake eni wene takakolepa manipete taatekoa toatekoleke oko patu, edoa taatekoa toademe oko patu wa pine tuku toa kawa tuma-kala nekeneya.

<sup>12</sup> Nitane ali-kiti Akolaliyo eya wa wene takapikala taneya. Enika enilepa kiwi meki-pete taatekoa toamoko. Nani mati mekoi ali atoa kakoi-pete taatekoa too wa wene takaneyaya. Nani mati mekoi ali atoa wapa anu oya-lawe kiwike okome akeneya. Eina papete wene takapianele opi taatekoa toko. Enilekepa Kerai suno kipaala toawe okoina ali-kitame i i wa pine toa okoina. Nipa Akolaliyo one Epetane Yomini a tibu meaneya moa wetekakale awinokome wene takakana toa toawe okoina. Eina okoinapa a tibuke meki edelo ali-kitameka pine pitiane yakadiya wa wene pianeya meki.

### *Kiyo Akenele-kama Toatekomo*

<sup>13</sup> Nikepa eya tamene wane uku. Kini wene moa labakanele tewitiko wawa utanele-kama toma yamene. Ni Yesu Kerai suno wakapea noka-pete Akolaliyo pewe witikome toatekaleke wene piitikaneya meamene-ye. <sup>14</sup> Akolaline nimini agale wete yakameneya mekete ele kule poanele toada wa namolo tokoina toa wa pade toameamene. Oneme ta wa okale-kama toomoa pamene. <sup>15</sup> Padele padele tikilepa kipa one wa kayo oa motoko ago Akolaliyo epenele-kama toma poko toa tamene. <sup>16</sup> Akolaline bokuke

agale pade eya wa wia mekane toane ni uku. *Akolali nopa epenele-kama tukuyano, kimeka epenele-kama toma yamene wa akeneya.* <sup>17</sup> Ali atoame tanele-kama takoa enoa akako ago Atai Akolaliyo kiwi peya midi piitapeane tetepo takoa mekome kini tanelepa epetaneleka poaneleka takoa enoa akakala toko. Nitiko ago-palapa kime kowitikala tikino, itonoke pa tekei meatiki yene tetepo takoa meato wa oneke nate wene pianeya lukoa meamene. <sup>18</sup> Itonoke mekoi ali atoa kini kaua-mikitame paya peku lawetanele noa toma nokoika Akolaliyo kiwi oto toa motaneya. Nipa golo silepa enika eni pia kawamateko kamoyakitame oto toa motaneya mena. <sup>19</sup> Nitameneya one etene kamoyamepa oto toa motaneya. One etene kamoyapa mana Keraisuno kamate. Keraisu einagopa ipu kodo dedeyaka piamene sipi sipi kai tine keneya tukale kamate ponoka. <sup>20</sup> Akolaliyo one mana kiwike tumotono wene toopikilepa itono tibuta wete latiameneyake taneya. Nitaneyake wipitikome kiwike tuou wa taatekoa nome tuka. <sup>21</sup> Akolaliyopa mana Keraisu eni tukale moa kamotokakomepa one ibini kamotokaneya. Nitaneyano, totoka moa kamotokoo wa eni toatekale wedianeya nepia meketepa oneke wene tugoa meko.

<sup>22</sup> Nipa Akolaline nimini peku nootokoapa kini namolo poane wene wia wawa eya tekete tiki. Wene takuta piameteko Keraisuno ali atoake wene mekoa mekete tiki. Nitikete tikino, odene wene piitiko kina kina ete oto wa wedoa wene mekanali yoma pamene. <sup>23</sup> Akolaliyo mati opiou toa kipa one mana kono-mikiti moa latikaneya

tokolo ni uku. One mati-kiti eni moa latikakilepa pa tua poatekagome mati opikome toko toa mena. Kini mea kawatiki peku lawetekome taneya. One eni laweteko pekupa Akolaline pia kawateko agaleke uku. <sup>24</sup> Nikepa Akolaline bokuke eya agale wia mekane toane ukuno, yakamene.

*Ali atoa peya itonoke mekilepa ke witoa kako ke tetepo taneya meki. Nipa ibini akene yenedo tetepo taneya meketepa ke tidiyo kalaneya witoa kawa okoa pitako toa pa tekei koniyali atoa meki. Ke totoa tuutapea tidiyo okoa pitoa tokoyake <sup>25</sup> Akolaline peku pa pia kama poko wa panagome wia mekaneya.*

One eni peku wane ukupa Keraisunomo kini wene epetaneya memotoa toawe akenemoke uku.

## 2

### *Akolaliyo Takoa Motane Yapu Pigi*

<sup>1</sup> Kipa Akolaline peku mati-kitino, padele padele poanele tikile peya tewitikoa wamene. Kapene agale wamoa ni Akolalinele takakilepa wene takuta pianeya mea toamoa ni eko pade ali-kiti moane patukoane ako meadiya wa eni yene-pala wene poamoa ni akoa agale wamoa tamene. <sup>2</sup> Akolaliyo one peku lawetekilepa paya peku eletekakileka toamoko. I yene kiwi one mana kono-mikiti latikakene toane mou wa one peku lawetoono, nana matiyame-kiti adu nodo tokolo noa kako toa one peku noa piamene. <sup>3</sup> *Ali Munu agome one ina pekupa epetaneya-kama lawetekoya tadeko wa kime wene tekete ni naki.*

<sup>4</sup> Ali Munu wane uku agopa mea kama poko

ago. Nitiko agoke ali atoamepa ipa poadeko wa yapu wiatekoi yomo enoa wawou toa wakeneya. Nitaneyake Akolaliyo i agopa one kolotini ago wa takoa motaneyano, one-pala lipua meamene.

<sup>5</sup> Akolaliyo kipa mea kawatiki yomo one losu yapu wiateko yomo tetepo takoa mea Keraisu-pala moa lipukoai toko. Oneke padeya mea lodo you toa kinikile wawa toamekete Keraisu patu kautakoa kawa onekele takama pomotoa tokome ni toko. <sup>6</sup> Ina ukunapa Akolaline bokuke agale tigini pade papete eya wa wia mekane toane uku.

*Anume tukule enoe. Saione takepa tobou kakaku yomo yapu pigi takoane moane wiou toane anu kolotini ago moane kakaku. Einagoke wene tugoa mekoi-kitame oneke ya motikileka toamoi wa Akolaliyo akene toa panagome papete wia mekaneya.*

<sup>7</sup> Oneke wene tugoa meki-kiti kime eni yapu pigi wane uku agopa tobouya latikakete tiki. Nitikiyake pade-kitame oneke wene tugoa meamiki. Eni yeneke Akolaline bokuke eya wa wia mekaneya piko.

*I yomopa poadeko wa yapu wiane yename paya tetepo takoa wakeneyake panagome i yomopa yapu pigi wa moa wianeya wa panagome wia mekaneya.*

<sup>8</sup> Wa enikepa eya waka wia mekaneya piko.

*I yapu pigi wane ukuya pikata ali atoa ogo witikale kaiapitoi. Nipa puku pekete toa kamedekamotekete pitoi wa panagome wia mekaneya.*

Eina wia mekapiane toa taatekoapa eni yene one agale yakoa moamekete tekete pata paka puku

pekete tiki. Nipa Akolaliyo papete wene toopi-anele eni tiki.

<sup>9</sup> Anu oya-lawe kime pade enile toamiki. Akolaliyo kipa one yatene wa takoa motoka tokolo oneke lukoa meki. Ali Muno agoke lodo you toa onekele takakilepa tobou yene tetepo tokolo tiki. Akolaliyo kipa one yatene wa talo toa meko. Onekele-kama takoa memotoa ni toko. Kiwi yomiyomu keneke mekoika one pa takaloganeya meku ta noatino noe wa kayo oa motoka ago Akolaliyo kiwi takoa motikilepa one padele padele tubele tanemo i i wa one kei pimotoa tokome ni toka. <sup>10</sup> Namolopa kipa mone ali atoa tetepo taneya mekoinake opa Akolaliyo takoa motane ali atoa wini mekina. Namolopa Akolaliyo ali atoa ela motokome tokole wene toameneya mekoinake opa wene taneya wini mekina.

### *Akolaline Ali Atoa Mekete Toatikimo*

<sup>11</sup> Anu oya-lawe kipa itonoke pa tekei meatiki yene mone yene tetepo taneya mekino, eya tamene. Kini tepene ele kule poanele toadiya wa wene piki toa witakome kini yomini-pala poi teigala tokono, eni poane wene tewitikoa wamene. <sup>12</sup> Nipa mone take Akolaline agale yakamene ali atoa pake pake dekakoa mekete epetanele-kama tamene. E yenamepa i yene kime poanele toma yaki wa akoa agale okolika nitamene. Akolaliyo ali atoa takoa enenoka-pete kini epetanele-kama tokoli enekoinakaleke e yename Akolali kei piatikiyano, nitamene. <sup>13</sup> Ali Munoke tou wa eya toma pamene. Ta talo tiki yene peyake poti lukoa meamene. Nipa ako odene tobou meko

agome ta piko peya pitiki ali atoa talo tokome tamene wa oka toa litia tamene. <sup>14</sup> Ako odene meko agoke lukoa meki tobou ali-kitikeka poti lukoa meamene. Poanele tokoi ali atoa kibu moa ni epetanele tokoi ali atoa kei pia topoatino poe wa ako agome moa kakoa wetekaneya tokolo ni uku. <sup>15</sup> Paya peku noa tiki yename emo kumo pamo okoimo teigoa wamotono, epetanele toma pamene. Akolaline wene piko toane eni uku. <sup>16</sup> Ta pine agono mana kono-mikiti kini take atiki toa meki toa anu oya-lawe kiwi Keraisuke atiki toa lukoa meamene. Nitoa meketepa ele kule tamele tokono, poaneleka tato wa wene pia toameamene. Kipa Akolaline pupu takatiki yeneno, onekele takakete toatiki toa toma yamene. <sup>17</sup> Ali atoa peyapa paya tetepo takamoa kei pikala tamene. Keraisuke wene tugoa meki-kitike wene mekoa meamene. Akolali piti motaneya mea ni ako odene meko tobou agoke poti lukoa mea one kei pi ai tamene.

*Keraisu Yoto Pitia Tete Moma Poatekomo*

<sup>18</sup> Kueme topo toa moa egetaneya meki yene kipala eya wane uku. Ta pine yename tamene wa talo tekete okoli yoti mitikatekoa mea yakoa tamene. Poti ko akene wene pia talo toa epetekako agome ta wa oka toa tamene. Ni talo toa potokako agome tamene wa tete-pala pa puputua metekome okaleka tamene wane uku-ye. <sup>19</sup> Akolalike wene piitikaneya mekete eni tete poti ko akene wene pia motokolipa nipa Akolaliyo i yene kime toa epetekaki wa pewe wioo tokolo ni uku. <sup>20</sup> Kime padele poanele tokoike talo agome layo toua witikaledo kō akene wene

pia tete motokolipa kiwi teyo kei pimotoa-pe. Padameka kei piamoi-li. Wa pine agonole wedoa takakoike pa puputua layo toua witikaleka kime ko akene wene pia tete motokolipa Akolaliyo kiwi kei pia kawoo. <sup>21</sup> Akolaliyo kipa one yene wa kayo oa motikilepa kime tete edikoa momotoa tokome ni taneya. Keraisu kiwike tete moa kawa tukilepa kini itonoke mekete toatekoile adeka pia taneyano, Keraisu yoto pitia tete moma pamene. <sup>22</sup> Keraisu einagome poanele nateleka toamoa kapene wakoa agaleka wamoa taneyake tete mokoa kawa tuka. <sup>23</sup> Ete ali-kitame one tea kakolika ete poanemo topo takoa wamoka. Ni tete metekoli kiwika wiou wa wamoka. Eni yename nitikolika oneme pade koiso akamoka. Nitameneya kiyoke-kama takoa eneko ago Akolaliyo one koiso yakoo wa oneke wene tugoa meka. <sup>24</sup> Ni tone namolo poanele tokoole tewitikoa wawa kiyo akenele toma pomotoa tokome Keraisuyo eya toka. Tone eni tokoo poanele one tiginike awitikaneya pome yomo lekaneyake tuka. Einago layo toua wikala tanelemepa anu oya-lawe kiwi latekatapeneya meki. <sup>25</sup> Papetepa sipi sipi kai-kiti etepea pou toa paka pote atupokoiyake opa kiwi talo toa kini yomini pikoa kawa toko ago mekota wakapea pote meki.

### 3

#### *Adona Mekete Toatikimo*

<sup>1-2</sup> Enakale toa atoa yatename kinikaneyo tamene wa okoi toa yakoa tamene. Enipa atoa pade nekaneyo Akolaline agale yakoa

moameneya mekalepa Keraisuke wene tugamoto, nitamene. Nitikalepa nekaneyo ae anu natoname anu agale yakoa motokono, Keraisuke wene tugoa mekome ni toko wa oneka Keraisuke wene tugoo. Neke pademoka wameneya kiyoy akenele toa ni yoti mitikatekoa mea tokale enekomema nitoo. <sup>3</sup> Kini tiginiki kalakilepa tou wa enileke wene piitikoameameamene. Nipa pine puputua pitikamoani golo kue wane kabeke piamoa ni kamo mamina kawamoatamene. <sup>4</sup> Nitameneya kinyominyo koniyoy takoy toa tekete poti ko akene wene pianeya meameamene. Eni koniyoyapa takoy poameneya pa kela pia kawoo. Akolaliyoy ei kiwi edikoy memotadiya wa wene pianeya meko. <sup>5</sup> Namoloy papete Akolaliyoy takoy motane atoyakityoneke wene piitikoameketepa edikoy kalaneyameoy toa kinikaneke poti lukoy meaneya. <sup>6</sup> Ibinyo akene atoy Serayoy edikakome onekane Eberamepa Ali Muno wa oay oneke poti lukoy meay taneya. Anuy oay atoylawe kime kiyoy akenele-kamay toa padelekeka piti moameneyameay teketepa Serane konyomikityo tetepoy taneyameoy.

<sup>7</sup> Enakale toay ali yatene eyay tamene wane uku. Kini natony kouy meketepa nipy ay atoy anuy tele kotuy kawameneyay tabay taneyameko wamamamoy keiy piay tamene. Akolaliyoy kiny natonykityo kiwi midy piay tetepoy takoy pewe witikilepameay kamay pomotoy tokome toko. Nitikony, kiny kowitoy okoyimo Akolaliyoy yakomokayanyo, inay ukule tetekameneyay litiy tamene.

*Padele Epetanele Tokoike Tete Motanemo*

<sup>8</sup> Eya wane wipitikene ukuno, yakamene. Ete oto wa odene wene-kama pia ela moa tamene. Nipa ete oto wa wene mekoa mama moa yoti mitikatekoa mea tamene. <sup>9</sup> Poanele toko ago-pala poaneleme ete topo takamoa ni tea agale oko ago-pala poanemo topo takoa wamoa tamene. Nita-meneya Akolaliyo ne pewe wimotoane uku wa topo takoa amene. Akolaliyo anu oya-lawe kipa one wa kayo oa motikilepa kiwi pewe wiou wa tokano, nitamene. <sup>10</sup> Akolaline bokuke panagome eya wa wia mekaneya.

*Panagome-kiti itonoke wedianeya yawane piou wa wene pia ni ta pataka abuna meane epetekou waka wene pia tokomepa poane agale wamoa ete yene oa yotokamoa tamedeko.*

<sup>11</sup> *Ni padele padele poanele tewitiko wa wawa epetanele tamedeko. Ni ete yene-pala odene wene pianeya meou wa oya kakademe wili toa kamedekolo uku. Akolaliyo eya tokolo tekene ni uku.* <sup>12</sup> *Akolaliyopa kiyo akenele toma yaki-kiti leneme wia mea ni kini kowitikete ikimo-pala kale piyakoa mekoyake poanele toma yaki-kiti mukiti yamea wako wa Akolaline bokuke wia mekaneya piko.*

<sup>13</sup> Epetanele-kama tou wa wene pianeya yako ago-palapa teyo poaneleme topo takoo-pe. Padameka poaneleme topo takamoi. <sup>14</sup> Anu oya-lawe kime epetanele toma pokoike pade-kitame tete metekolika wedia meamene. Akolaliyo pewe wia yopioono, pa ali-kitame tete metekaya wa piti moamoa kepeneka mama moamoa tamene.

<sup>15</sup> Nitoapa Keraisu einagopa kini Ali Muno wa oneke nate wene pianeya meamene. Keraisu einago wakapea nomotoa nepia mekete wedia mekino, dekolo tiki-pe wa pade-kitame kiwi pitia yakoino, eni yene-pala topo takoa oatikimo wene kibutua meamene. <sup>16</sup> Nitoapa i i wa toaweia ikilepa yoti mitikatekoa mea potimokama amene. Enipa Keraisu patu kautakete mea epetekakoileke ete-kitame kipala akoa agale okolipa nipa ae kapene agale inapa ekete tadeko wa eni yene ya motokamotono, kini tepeme ta wa epetekoia okale-kama litia epetanele toma yamene. <sup>17</sup> Kini toa epetekakoileke ete yename tete meoi. Akolaliyodo one wene litikome eni tete memotoa tokalepa epetoo wa poti eni tetepa moma pamene. Kini padele poanele tokoilekedo tete motokolipa nipa poo tokolo uku. <sup>18</sup> Keraisu kiyo akenele-kama toko agomempa ali atoame poanele tokoike nami wiane tuou wa tuka tokolo ni uku. Etene Akolalike kiwi koua pome wetekapademe ni nome tuka. Nitoa nome tukake wa pade tukileka toamoo. One tiginipa wia tukaneyake one yominipa takoa mea-kama poko. <sup>19</sup> One Yomini takoa pokomempa Akolaliyo po yapu moa mekane yomini-kiti meane take pomempa ali atoa toa motanemo i i wa mo wia kakeneya. <sup>20</sup> Eya ali atoane yominike uku. Akolaliyo pubu okana toa Noayo tube ue dipi pade latia-kala kakeneya. Nitikakoa Akolaliyo one eni pubu akene agale yakoa moamene ali atoame kini poane wene wia wamotoa poti ko akene wene pianeya mekome nepia meaneya. Nitikaleka e ali atoame yakamokoli o Noa ti natetekoa ketepo

kakoa (8) einakeya keneke petoa pote mepokoli Akolaliyo e poanele toa yakamene ali atoa peya ue nakoa tumotoa wakeneya. E yene tumotoa wakeneyake Noa ti toa motaneya. <sup>21</sup> Akolaliyo Noa ti edikoa toa motikilepa nipa anu oya-lawe kime ue motokoli toa moateka adeka pia taneya. Kime ue motikilepa kini tiginike kakene kege koadete tokoiya mena. Nitamekete Akolaliyo kini tepene poane wene takoa koikakamotoa tekete Akolali nekele-kama takou wa kime ue motaneya. Nitimotoa tokome mana Yesu Keraisu nome mea tuake kamo poka. <sup>22</sup> A tibuke Akolaline nimini yono kouno lono pome kapoko ago Keraisuke uku. Nitiko agoke-kama edelo ali yateneka eya kuya peya yopia meki yateneka lukoa meki.

## 4

### *Namolo Wene Wia Wakete Wenele Toatekomo*

<sup>1</sup> Keraisu tonu melepu kakeneya nome mea tete moko kakano, one tete motokome toka toa ki-wika kepene mama moameneya tete oyake mou wa wene pianeya meamene. Tete moko kako agome-kiti one poanele namolo toma pokanakale tewitiko wako.

<sup>2</sup> Dikako agomepa one namolole tewitikaneya mekomepa papete ele kule poanele toada wa wene pikana toa litia toamokome Akolaliyo wene piko toane litiane tamedeku wa kiyo ootokoa meko. <sup>3</sup> Namolopa Akolaline agale yakamene yename ele kule toada wa etepea toma pokoile kimeka toma pokoi. Nipa oyakeno, wa pade toameamene. Papete eya ya tanele toma pokoi. Pamoko mea ni koua piamatekoi atoa koua pia

ni bia ue eya nokoa pia ni ali atoame poanele toa oboa mekoika paya ulu toa ni toge kia mekoika gerepi po ku ue nokoa kawa ni Akolaliyo kote motokole tekete paya gode-kiti kowitoa tokoi. <sup>4</sup>Opa Akolaline agale yakamene yenamepa kini poanele-kala toa etepea pikika kime koua poamikili enekete wene kainya pianeya mea kipala poane agale okala tiki. <sup>5</sup>Nilepa kime dekale tokoi-pe wa Akolaliyo kini koiso akoo. Wete tua pekene yeneka tuameneya pa meki yeneka takoa enoa akateka agome nitou wa enile toademe nodokakoa meko. <sup>6</sup>Nitatekoya tokome tua pekene ali atoa-palaka Yesunomo oa metaneya. Nipa Akolali one yomini-pala mea kama poko toa kini yominika mea kama pomotoa ni taneya. Ali atoa peya itonoke mea tukala toi wa Akolaliyo kiwi kibu moateka wene toopiane toa tukala taneyake tua pekene yene-palaka Yesunomo oa metaneya.

<sup>7</sup>Itono tibuta takoa poateko tigotokono, Akolali wedoa kowitadetepa utanele-kama toa poti yawa piamene. <sup>8</sup>Eyaka tamene wane tobou kakoane uku-ye. Kini kini wedoa wene mekanali yamene. Tone tone wene mekanali yoteketepa nipa toto-pala tane poanelepa ete oto wa topo takamekete edikoa kaukoa mekete too. <sup>9</sup>Kini oya-lawe kini yapu nee noatino, noe wa makutukoa moamene. Nipa ko wameneya wedia mea tamene. <sup>10</sup>Akolaliyo kiwi peya pewe witikome one peku eya kuya tutu tutu wa lawetekanano, one eni peku noa teketepa ele kule toa yete pade ali atoa auapeamene. <sup>11</sup>Nitua Akolaline agale toawe akaketepa nipa Akolaliyo akamene wa oka toa-kama akamene. Yete pade ali atoa

auapeketepa nipa Akolaline tele patu kautakoa kakete tamene. Kini eni toma pokoile-kama enekete ete-kitame inapa Yesu Keraisuyo ete-nanele takakome yametanele tiki wa Akolali kei pimoto, nitamene. Akolaliyo eya kuya peya yopia-kala kama pokono, ke wa one kei piatoane uku. Ee nimini.

*Tone Keraisuke Toa Tete Moatekomo*

<sup>12</sup> Anu kolotini yene kipala i ukumo yakamene. Padeleme ke enekakolo mekete dika dika toamene tete mokoa wini kakino, edekolo ipa tokoa kakoto patu wa wene kainya pianeya meameamene. <sup>13</sup> Ipa Keraisu nome mea tete motane toa kimeka mokala toko wa poti moma pamene. Nipa Keraisu einago pa teleta tootapeneya wakapea nokale ke wa kolotine meadetepa pa widikoa meamene. <sup>14</sup> Anu oyalawe kime Keraisunole takama yakoike pade-kitame tedu mea ya motokakolipa kolotine meamene. Eni yename edikakolipa Akolaline Yomini kiwi pa teleta takateko Yomini kiwike awinome meadeko wa wene toino, kolotine meamene. <sup>15</sup> Kiwi padameka ali wia tukamoa ni panagoneya kode moamoa ni ta talo toko agono agale tagamoa ni kotu kabunu kawamoa tamene. Edikakoikedo tete moteketepa nipa pata paya moino, toameamene. <sup>16</sup> Nitameneya Keraisu litikoikedo ete-kitame tete metekolipa nipa ya moameneya inapa Keraisuno yatene ago mekulu ni tikino, ke wa Akolali kei piamene.

<sup>17</sup> Akolaliyo ali atoa takoa enoa akateko oipa opi. One eni toatekole taatekoa tikilepa namolo takoa one yatene ali atoa totome eni tete momotoa

toko. Wa naniko onekemo yakoa moamokoi ali atoa takoa enoa akakomepa dika dika toamene tete meoo. <sup>18</sup> Enikepa Akolaline bokuke eya wa wia mekaneya piko.

*Akolaliyo kiyo akenele toma yaki yene toa motikilepa wili tokoa kawa toko. Enile tamene poto toko. Ae, onekele takameneya poanele toma yaki yene edoa toa momotoa-pe wa panagome wia mekaneya.*

<sup>19</sup> Nipa Akolaliyo wene pika toa tete moteketepa oneke poti lukoa mekete epetanele toma pamene. Kiwi latia mekane ago Akolaliyo oneme tou wa oka toa-kama tokome kiwi tewitikamoono, nitamene.

## 5

### *Yesuno Ali Atoa Talo Yene-pala Akenemo*

<sup>1</sup> Yesuno ali atoa talo takoa meki ali-kiti kipala i ukuno, yakamene. Nopa eya ago mekene uku. Kini yagono ago noka Keraisuno ali atoa talo takakuya. Keraisuyo tete moa mekale anu leneme enekou. No nitikou agopa Keraisu einago pa teleta tootapeneya keleyo wakapea nokale one-pala opi-ane meou.

<sup>2</sup> No nitateku ago tekene eya tamene wane uku. Akolaliyo one ali atoa talo takamene wa tatia yametekana ali atoapa sipi sipi kai-kiti tetepo takoa wedoa talo takamene. Nitiketepa talo takamene kote tokolo mekeneke tuku wa edikoa wene piameamene. Ipa Akolaliyo wene piko toane tuku wa wedia mea tamene. Kue mou wa kuke-kama wene piitikoa mea toameamene. Kini weneme wedoa talo tamene. <sup>3</sup> Akolaliyo tatia

yametekana ali atoa talo takakomepa toe toe wa tika tika toameamene. Nitameneya kini wini ali atoa mea epetekatiki kotu pia meamene. <sup>4</sup> Wa naniko ako odene mekome talo toko ago Keraisu taatekoa wakapea nokalepa Akolaliyo kiwi kei pikome pa teleta tootapeneya mea kawatekoi peku lawetoo.

<sup>5</sup> Tuali yatene kipala eya wane uku-ye. Wetini yename tamene wa okoi toa litia tamene. Mamina epetaneya moa kawou toa ete oto wa auapenali yoma pato wa yoti mitikatekoa meamene. Enikepa Akolaline bokuke eya wa wia mekaneya piko. *Akolaliyopa ete yene paya tetepo takoa mekiki kote tokolo wakoyake yoti mitikatekoa mekiki pewe wia kako wa panagome wia mekaneya.* <sup>6</sup> Nitaneyano, telekole-kama toko ago Akolalike poti lukoa mekete yoti mitikatekoa meamene. Nitikolipa Akolaliyo kini ibini kamotokoa kei pioo. Eni kei plateka-petepa nitoono, oneke poti lukoa meamene. <sup>7</sup> Akolaliyo kiwi mama moa yopikono, kini wene moa keda takanele peya oneme takoa moa katekamotamene.

<sup>8</sup> Uutukoa poti yawa lene kilikoa piameneya wedoa meamene wane uku. Laione kaime ali kamate abetema yakome kou oko toa kipala poi teiane ago Setanuyo kiwi wiou wa tuku toma yakolo ni uku. <sup>9</sup> Kini oya-lawe ta piko peya pitikika odenele tane tete mokala tekete tiki wa wene taneya mekete Setanu ete pedeka pedeka tamene. Nipa poapeneya kakete Akolalinele wedoa takama pote nitamene. <sup>10</sup> Eni tete opi-mene mootokaneyake Akolaliyo kiwi mea epetekatekoi kotu kakoa mekoa mape wia tele takoa too. Pewe-

kama wia kako ago Akolaliyo kiwi mea kawatiki peku lawetou wa kiwi kayo oa moa Keraisu-pala lipukoa taneyano, nitoo. <sup>11</sup> One telekole-kama tokana toa pa toa-kala kama pokono, ke wa one kei piatoane uku. Ee nimini.

*Pitayo Wipitikome Lionate Akenemo*

<sup>12</sup> I agale tigini deya i i wane oane wini wetekakupa nipa Akolaliyo one ali atoa toto pewe eteneya wima pokomo toaweane uku. One pewe wia yopikota poapeneya kamene wane kiwi mama motekene uku. Nitikenepa anu oyago Sailasi Akolalinele wedoa takama pokoke kei piku ago i agale neme wia mekakoano ta wane uku toa yakoa wia mekakako-ye.

<sup>13</sup> Babilone wa aue paigoa akene Lome take pitiki ali atoame wete meamene wa iki. Nipa Akolaliyo kipala odeneka dekoa takoa motane yename iki. Anu mana latikakounakago Makeyoka kiwi wete meamene wa oko. <sup>14</sup> Kiwi koukoa mekete-kama i ali i atoa neeke wene mekoane mekuno, ke wa yono ete oto wa mokala tamene.

Keraisu-pala lipua meki-kiti kiwi peya poti likaketikoa memotoane kini kowitikoane uku-ye.

Opa enina-ye.

**Weneya Totono Keraisu Yesunomo**  
**The New Testament in the Witu Language (also known**  
**as the Wiru Language) of Papua New Guinea**  
**Nupela Testamen long tokples Witu long Niugini**

copyright © 1990, 1992 Wycliffe Bible Translators, Inc.

Language: Witu (Wiru)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 4 Mar 2023 from source files dated 22 Nov 2019

160088da-6131-52e6-9b0f-c3dc6e8c6abb